

西河薩祖元陽大帝救苦經序

代天說法憫一切眾生不明本來不知覺路如行大荒之中及至半途後路忽陷惟有向前而已當前又有銅牆鐵壁無可著腳處欲向左行深塹萬丈若於右行懸澗千尋苟若於此一失足跟悔之無及何以說欲障易化理障難除非明明現現認賊作子則死木稿灰無想爲真一謂弄虛靈一謂斷種性豈非一左一右喪身之地須欲仍放本輝念茲在茲一破疑團自現覺體自然意入無意意無所意情歸不情情無所情不見不聞無聲無臭若至於此仍莫認著一著總非百無一是所謂望道而未之見真尚不著何況幻妄覺尚不著何況虛假所以此中境界非色非空非顯非微只有疑慮無有信處實有所在當觀念之所自起自何所了知起處便知落處久而見起念之始久而見念始之先所謂憫一切眾生者有畏其高矣美矣未可幾及遠哉大哉未可卒至有輕其寸莖之璧甯云照乘可比味淡無滋豈可瓊瑤相配此所以知者過而愚不及故因西河救苦經而爲之序

道藏輯要

呂帝文集

八

室集五
川 81